

Leið ehf.  
Jónas Guðmundsson  
Miðstræti 1  
415 Bolungarvík

**2006030082**  
5612; 5604; 9310

Reykjavík, 29. ágúst 2007  
/--

**Efni: Vegur við Svínavatn í Húnavatnshreppi og Blönduósbæ (Svínavatnsleið).  
Ákvörðun um tillögu að matsáætlun.**

Í samræmi við 8. gr. laga nr. 106/2000 m.s.b. um mat á umhverfisáhrifum er hér kynnt niðurstaða Skipulagsstofnunar um tillögu Leiðar ehf. að matsáætlun fyrir veg við Svínavatn í Húnavatnshreppi og Blönduósbæ (Svínavatnsleið).

Skipulagsstofnun barst með bréfi Leiðar ehf. dags. 15. júní 2007 tillaga fyrirtækisins að matsáætlun:

**Leið ehf. Vegur við Svínavatn í Húnavatnshreppi og Blönduósbæ (Svínavatnsleið). Náttúrustofa Vestfjarða. Júní 2007.**

Skipulagsstofnun leitaði umsagnar um tillögu framkvæmdaraðila hjá eftirtöldum aðilum í samræmi við 8. gr. laga um mat á umhverfisáhrifum: Sveitarstjórn Blönduósbæjar, sveitarstjórn Húnavatnshrepps, Byggðastofnun, Fornleifavernd ríkisins, Heilbrigðiseftirliti Norðurlands vestra, Landbúnaðarstofnun - veiðimálastjórn, Skógrækt ríkisins og Umhverfisstofnun. Skipulagsstofnun kynnti tillöguna einnig með fréttatilkynningu og á heimasíðu stofnunarinnar.

Skipulagsstofnun bárust umsagnir og athugasemdir frá eftirtöldum aðilum: Sveitarstjórn Blönduósbæjar með bréfi dags. 11. júlí 2007, sveitarstjórn Húnavatnshrepps með bréfi dags. 5. júlí 2007, Byggðastofnun með bréfi dags. 28. júní 2007, Fornleifavernd ríkisins með bréfi dags. 28. júní 2007, Heilbrigðiseftirliti Norðurlands vestra með bréfi dags. 27. júní 2007, Landbúnaðarstofnun - veiðimálastjórn með bréfi dags. 9. júlí 2007, Skógrækt ríkisins með bréfi dags. 5. júlí 2007 og Umhverfisstofnun með bréfi dags. 25. júlí 2007. Athugasemd barst með tölvupósti 4. júlí 2007 frá Mæva Marlene Urbschat og Raimund Bernhard Brockmeyer-Urbschat, Litla Búrfelli, Húnavatnshreppi.

Skipulagsstofnun bárust einnig frekari upplýsingar frá framkvæmdaraðila í kjölfar umsagna og athugasemda með bréfum dags. 8. og 23. ágúst 2007.

**NIÐURSTAÐA SKIPULAGSSTOFNUNAR**

Í samræmi við 8. gr. laga um mat á umhverfisáhrifum hefur Skipulagsstofnun farið yfir framlagða tillögu Leiðar ehf. að matsáætlun ásamt þeim umsögnum og athugasemdum sem borist hafa stofnuninni. Skipulagsstofnun fellst ekki á tillögu Leiðar ehf. að matsáætlun.

#### **Rökstuðningur og leiðbeining skv. 8. gr. laga nr. 106/2000.**

Skipulagsstofnun telur í ljósi umsagna sveitarstjórna þar sem framkvæmdin er fyrirhuguð, þ.e. Húnavatnshrepps og Blönduósbæjar, að fyrir liggi að framkvæmdaraðili muni ekki geta uppfyllt ákvæði laga nr. 106/2000 m.s.b. og reglugerðar nr. 1123/2005.

Í umsögn Húnavatnshrepps segir m.a.: „Í ljósi fram kominna athugasemda landeigenda og ábúenda í Húnavatnshreppi leggst hreppsnefnd Húnavatnshrepps gegn fyrirliggjandi tillögu að matsáætlun.“

Í umsögn Blönduósbæjar segir m.a.: „Bæjarráð ítrekar fyrri afstöðu bæjarstjórnar Blönduósbæjar vegna hugmynda um lagningu vegarins, sbr. bréf dags. 9. febrúar 2006 og umsögn um tillögu til þingsályktunar um samgönguáætlun fyrir árin 2007 – 2018, dags. 1. mars 2007. Á grundvelli andstöðu bæjarstjórnar við fyrirhugaða framkvæmd sér bæjarráð ekki ástæðu til að veita umsögn við tillögu að matsáætlun fyrir veg við Svínavatn enda er hugmyndin í hróplegu ósamræmi við skipulag svæðisins, afstöðu sveitarstjórnarmanna, landeigenda og ábúendur þeirra jarða sem fyrir raski myndu verða. Meðfylgjandi er afrit af undirskriftalista eigenda og ábúenda þeirra jarða í sýslunni sem framkvæmdin myndi hafa áhrif á og kemur þar skýrt fram að lagst er alfarið gegn lagningu umrædds vegar um Svínavatn í Húnavatnshreppi enda samræmist veglagningin engan veginn áformum þeirra um áframhaldandi framtíðarnýtingu jarðanna.“

Skipulagsstofnun telur í ljósi ofangreindrar afstöðu sveitarstjórna og landeigenda að framkvæmdahugmyndinni sé hafnað og þar með nauðsynlegu samstarfi og samráði við framkvæmdaraðila sem er forsenda þess að í frummatsskýrslu séu uppfyllt ákvæði 9. gr. laga nr. 106/2000 m.s.b. sbr. og 18. gr. reglugerðar nr. 1123/2005 er varðar það að gerð sé grein fyrir umhverfi á hugsanlegu framkvæmdasvæði, þ.e. náttúrufari, landnýtingu og samfélagi og áhrifum framkvæmdarinnar á þessa þætti.

Skipulagsstofnun bendir á að ekki getur orðið af framkvæmdinni nema hún sé í samræmi við aðalskipulag hlutaðeigandi sveitarfélaga og að fengnu framkvæmdaleyfi þeirra og að af umsögnum þeirra megi draga þá ályktun að þau hyggist ekki breyta aðalskipulagi til samræmis við framkvæmdahugmynd Leiðar ehf. og þar með ekki veita framkvæmdaleyfi.

Skipulagsstofnun beinir þeirri leiðbeiningu til Leiðar ehf., ef áform eru um að vinna áfram að framgangi þeirrar framkvæmdar sem til umfjöllunar er, eða útfærslu á henni, að vinna að málinu í samráði við sveitarstjórnir Húnavatnshrepps og Blönduósbæjar í samræmi við skipulags- og byggingarlög nr.73/1997 m.s.b. og lög nr. 105/2006, um umhverfismat áætlana.

Ákvörðun Skipulagsstofnunar getur framkvæmdaraðili kært til umhverfisráðherra sbr. 14. gr. laga nr. 106/2000. Kærufrestur er einn mánuður frá tilkynningu um ákvörðun stofnunarinnar.

Þóroddur F. Þóroddsson

Þorvaldur H. Þorsteinsson

Fylgiskjöl: Afrit umsagna og athugasemda.

Afrit: Umhverfisráðuneytið, Sveitarstjórn Blönduósþéjar, Sveitarstjórn Húnavatnshrepps, Byggðastofnun, Fornleifavernd ríkisins, Heilbrigðiseftirlit Norðurlands vestra, Landbúnaðarstofnun - veiðimálastjórn, Skógrækt ríkisins og Umhverfisstofnun. Mæva Marlene Urbschat og Raimund Bernhard Brockmeyer-Urbschat.